

In sguard a l'istorgia da la cultura da bogns (part 2)

Le Prese

Construcziun da la chasa da cura 1856, meglieraziun ed amplificaziun da las installaziuns dals bogns termals 1861. Le Prese sa recumandava sco lieu d'acclimatisaziun ideal surtut pervia da sia posiziun tranter l'Italia dal Nord ed ils instituts da cura da l'Engiadina. Ils bogns sulfurics e termals vegnivan frequentads stediain fin il 1914. *Adolf Collenberg*

Clavadel

Aclaun en la vischnanca politica da Tavau, situà a 1664 m a l'entrada en la Val Sertig. En ils onns 1830 han ins erigi a Clavadel in bogn da zulper (daventà vittima d'in incendi il 1892), il 1890 ina chasa da cura ed il 1902-03 in sanatori, incorporads il 1916 en il Sanatori Wald/Turitg (oz clinicas da reabilitaziun/Zürcher Höhenkliniken Wald und Davos). Sper chasas da personal, numerus chalets ed in hotel a Clavadel, è actualmain era l'Alp Clavadel (1934 m) accessibla ed abitada l'entir onn. Construcziun da la Chasa dals amis da la natira 1933. *(red.)*

Serneus

L'utilisaziun da la funtauna da zulper per curas da bogn e da baiver è documentada l'emprima giada cun tschertezza il 1617. L'implant è vegnì renovà ed engrondì pliras giadas en il 19avel tschientaner. Suerter in temp da decadenza è il bogn puspè en svilup dapi il 1978. *Florian Hitz*

Fideris (Fadrein)

Il 1464 è attestà in Fadrein Bogn, destrui il 1545 da l'aua gronda e reconstrui per decret da Peter Finer, avugà austriac a Castels. Quest bogn è stà en funcziun fin il 1939 ed era il bogn d'aua minerala il pli impurtant dal Partenz (1895 240 giasts preschents il medem mument). Il 1967 è il bogn da Fadrein vegnì sutterrà, ensemen cun las funtaunas, dad ina bova. En il center dal vitg cun sias bellezgas chasas patrizianas e burgaisas cuntinueschan restaurants da gourmet cun la tradiziun gastronomica da Fadrein Bogn. *Otto Clavuot*

Jenaz (Gianatsch)

Il bogn da Gianatsch a Valdavos, avert tranter il 1733 ed il 1834, ha cuntanschì sia capacitat maximala (130 giasts) suenter l'engrondiment dal 1766. La funtauna d'aua minerala è accessibla al public dapi il 1941 (nov enchaschament da l'aua). *Otto Clavuot*

Seewis im Prättigau (Sievgia)

Dal 17avel fin il 19avel tschientaner ha la famiglia von Salis-Seewis già ina gronda influenza a Sievgia. Ella possedeve tranter auter il bogn da Ganey, situà a 1300 m, frequentà en il 17avel e 18avel tschientaner e destrui il 1799. La vischnanca da Sievgia è vegnida destruida duas giadas: il 1622 tras in incendi provocà tras ils Austriacs (tranter auter sco resposta a l'assassinat da Pader Fidelis von Sigmaringen), il 1863 tras in ulteriur incendi. L'emprima chasa da scola dal vitg datescha dal 1685. La via da colliaziun Pardisla-Sievgia, construida il 1858 (schlargiament 1980-92), ha obtegnì il 1889 in access a la Viafier retica. Da la buna colliaziun han profità il traffic da cura (chasa da cura dapi il 1865, oz center da reabilitaziun) ed il turissem. *Adolf Collenberg*

Fläsch

Quest abitadi situà il pli al nord dal Grischun al pe dal Fläscherberg e dal Pass S. Glièzi ha furmà in lieu da bogns enconuscent tranter il 16avel e la fin dal 18avel tschientaner. *Adolf Collenberg*

Passugg

Funtaunas termalas e chasa da cura sin territorii da la vischnanca da Curvalda. 1488 Basuk. Il 1562 ha rapportà Conrad Gessner d'ina funtauna ascha. A quest rapport suondan ulteriuras singulas menziuns. A partir dal 1863 han ins re-



Bogn Tenigia a l'entschatta dal 20avel tschientaner.

scuvert successivamain tschintg funtaunas. Il 1863 è vegnida averta l'emprima bavetta en la chavorgia da la Rabiusa, il 1883 l'emprima chasa da cura al Mühlerain. En ils emprims rapports vegnan las funtaunas termalas numnadas «auas d'Araschga», tenor la culegna a la cruschada da las vischnancas da Cuira, Malix e Curvalda. Il num Passugg, che deriva d'in bain en il conturn da l'enchaschament da las funtaunas, vegn utilisà dapi la fin dal 19avel tschientaner. La Passugger Heilquellen AG, che producecha aua minerala, è ida il 1998 en possess da la Feldschlösschen-Hürlimann Holding AG ch'ha vendì l'onn 2000 sia fatschenta da bavrondas a la bieraria danesa Carlsberg. La chasa da cura serva d'hotel da scolaziun a la Scola d'hotellaria e da turissem a Cuira. *Jürg Simonett*

Rhazüns (Razén)

Il vitg da Razén è situà a l'ur da la planira da Panaduz. Dapi il 1850 vegn utilisada la funtauna d'aua minerala da Razén («Rhazünser»), e quai en il stabiliment construi ad Undrau en direcziun Giuvaulta. *Linus Bühler*

Rothenbrunnen (Giuvaulta)

La funtauna da jod e da fier, che vegn menziunada gia da Johann Jakob Scheuchzer e ch'ha alimentà in bogn da cura fin il 1922, ha dà a la vischnanca il num tudestg. Il 1922 è vegnida realisada la chasa d'attempads chantunala ed ina staziun externa da la clinica psichiatrica a Cazas, il 1935 respectivamain il 1961 la chasa d'uffants ed ina scola speziala cun dimora. *Jürg Simonett*

Alvaneu Bad (Bogn d'Alvagni)

Las funtaunas da zulper vegnivan probablmain utilisadas gia en il temp roman (char da munaidas). Il bogn è menziunà per l'emprima giada il 1474, ed il 1747 han Johann Baptist Bavier, Johann Anton Grass e Meinrad Schwartz descrit l'effect curativ da l'aua. Las funtaunas han appartegnì en il 17avel tschientaner a la famiglia Walthier, en il 18avel tschientaner a las famiglias Simmen e Sprecher ed en il 19avel tschientaner als Balzers, possessurs dal bogn d'Alvagni. La posta a chavals, introducida sin la via nova da l'Alvra, ha dà novs impuls al bogn ed a la vischnanca a partir dal 1850 (commerzi, ustarias). La chasa da cura, renovada il 1866 ed engrondida il 1904, è vegnida serrada il 1962, spazzada il 1998 e remplazzada tras in complex da bogns (avert il 2001). Il 1997 han ins avert ad Alvagni ina plazza da golf ed ina nova chasa da cura. *Gion Peder Thöni*

Pignia

Vitg a mantun situà da la vart dretga dal Rain Posterior, cun Bogn. La funtauna d'aua da fier è vegnida explotada dal bogn da cura d'Andeer fin il 1893 (ina lingia construida il 1829 provedeva era ulteriurs manaschis da cura ad Andeer). Il bogn ha profità da la posiziun a las vias dal Spleia e dal San Bernardin, construidas en ils onns 1818-23. *Jürg Simonett*

Andeer

Pussaiavlads da gudogn offrivan l'all'evament da muvel, il svilup dal traffic suenter la construcziun da la via da transit (1818-23) ed il bogn da cura (a partir dal 1829). En il 19avel tschientaner ha Andeer remplazzà Ziràn sco center da la Val Schons. L'avertura da la lingia dal Gottard (1882) ha manà Andeer, privà dal traffic da transit, en ina greva crisa economica. Trais chavas da granit, la centrala da las Ovras electricas Rain Posterior (1962), il bogn termal (reconstrui 1982) ed il turissem da viandar e da cura offran plazzas da lavur. *Jürg Simonett*

San Bernardin

Sias famusas funtaunas da zulper, magnesium e fier, descrittas dal naturalist svizzer Johann Jakob Scheuchzer il 1717, è enconuscentas dapi ditg. *Cesare Santi*

Peiden

En il fund da la val, da la vart sanestra dal Glogn, sa chattan la chaplutta menziunada il 1345 (consecrada oriunda-

main a s. Sigismund, alura a s. Glièzi) ed il bogn da Peiden, enconuscent dapi il 13avel tschientaner. Sias trais funtaunas eran, tenor in document dal 1563, en possess da Peiden e da Camuns. Il 1812 ha ina bova, il 1868 l'aua gronda destrui las funtaunas, da quel temp en possess dal medi e cusseglier nazional Gion Barclamiu Arpagaus da Cumbel. Il bogn, reactivà il 1873, aveva in bun num en ils circuls socials pli elevads da la Belle Époque. Il 1891 han ins erigi ina nova chasa da cura ed il 1906 in edifiziu annex. L'Emprima Guerra mundiala ha mess ina fin al manaschi da cura, avert da mez zercladur fin la fin settember. *Adolf Collenberg*

Vals (Val)

Pir cun la construcziun dal stradun Val-Glion (avert il 1879) è la vischnanca s'orientada vers il nord. Il 1893 è vegnids averts la chasa da cura ed il bogn termal (in bogn è dentant documentà gia il 1732), il 1970 in nov center da cura da bogns. Il 1994-96 ha la vischnanca incumbensà l'architect Peter Zumthor d'eriger dal quarzit indigen in bogn termal modern, collià tras in corridor sutterranean cun l'Hotel Terme (il 1998 ha mess il chantun Grischun las Terme sut protecziun da monuments). Dapi il 1961 vegn vendida l'aua da Val («Valsewasser»). *Jürg Simonett*

Veptga

(Pass Pigniu / Panixerpass)

Tenor Durich Chiampell vegniva enturn la mesadad dal 16avel tschientaner blera glièud a far bogn en ina funtauna fraida da la vart grischuna dal pass per curar lur malsognas. *Martin Bundi*

Bogn Tenigia

Bogn da cura a l'entrada en la Val Sumvitg, in dals pli vegls bogns dal Grischun, menziunà il 1580 Bad in Wall, ma blier pli vegl. Attestà sco feud da la vischnanca da Sumvitg a Casper Willi. Il num Tenigia cumpara pir il 1860. Funtauna fraida da gip cun sal amar. Il 1670-78 en possess dal landrehter Clau Maissen ch'ha laschà construir il 1674 la chaplutta da Nossadonna da la Naiv e transfurmar la stiva da bogns en ina chasa per far bogns. Il 1882 ha Alexander Cagienard laschà renovar il bogn per 30 giasts. Ulteriurs edifizis èn vegnids construids 1892-96, in'atgna ovra electrica il 1905. Il 1911 ha la Hotel Waldhaus SA cumprà il Bogn Tenigia ch'è vegnì en difficultads finanziaras a partir dal 1914. Durant l'Emprima Guerra mundiala ha il bogn alloschà transitoricamain schuldata da la Germania internada. Il 1958 è il complex vegnì serrà suenter pliras renovaziuns. Il 1970 ha il Tudestg Ernst Ludwig Schulz acquistà il bogn e renovà quel en stil luxurius; il 1974 han ins alura avert il bogn nov, ma senza success (scussiuon averta il 1977). Il 1990 ha la Bogn Tenigia SA inizià ina nova epoca dal bogn da cura, ma danovamain senza success: il Bogn Tenigia ha puspè stui vegnì serrà il 2002. *Adolf Collenberg*

Disentis/Mustér

La funtauna da s. Placi, menziunada il 1740, ha la pli gronda concentraziun da radium da la Svizra ed è vegnida explotada suenter il 1870 per ils bogns da l'hotel da cura Disentiserhof, situads a l'entrada dal vitg. *Adolf Collenberg*



Johann Jakob Scheuchzer (1672-1733) menziunescha tranter auter ils bogns da Giuvaulta e San Bernardin.

Lexicon Istoric Retic

Il LIR cumpiglia bundant 3100 artigels (geografics, tematics, artigels da famiglias e biografias) davart l'istorgia grischuna/retica e la Rumantschia. Editura: Fundaziun Lexicon Istoric Svizzer; versiun online: www.e-lir.ch; versiun stampada: www.casanova.ch u en mintga libreria.